



Gabinete Wever - Croes II



ISLA ONLINE

Noticia di Gobierno

2023

Diahuebs 22 Juni 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!




@IslaOnline2023



E DEADLINE PA CADA SCOL POR ENTREGA NAN PROYECTO DI INNOVACION DI EDUTECH TA WORDO EXTENDI PA 7 DI JULI, 2023

Recientemente, Prome Minister Evelyn Wever-Croes a bishita varios scol cu a gana e proyecto di innovacion di Edutech pa admira e materialnan digital cu cada scol a logra haya. Mirando e entusiasmo di e muchanan y di e docentenan pa cu esaki, Gobierno hunto cu Futura, a tuma e decision pa extende e "deadline" pa cada scol por entrega nan proyecto final. E ultimo dia pa e scolnan por entrega nan proyecto lo bira 7 di Juli, 2023. Gobierno lo aloca un suma di 100.000 florin pa cu esaki.

Prome Minister ta extende un invitacion na tur scol pa probecha e extension aki y inscribi nan proyecto di innovacion di Edutech na www.edutecharuba.org, pa asina por participa cu e oportunidad di gana materialnan digital, cu lo ta di gran beneficio pa nan scol. Pa cualkier informacion y/of pregunta por bishita e webiste edutecharuba.org



Prome Minister Evelyn Wever-Croes: **GOBIERNO TA GRADICI TUR EMPLEADO** **PUBLICO CU TAWATA SOLIDARIO DURANTE E** **PANDEMIA COVID-19**

Hunto, den union y positivismo, nos lo sigui recupera



Na aña 2020, despues cu e efectonan devastador di Covid 19 a dal Aruba tambe, y medidanan di precaucion pa evita cu e pandemia bira mas desastroso pa nos ciudadanonan mester a tuma luga, nos pueblo a muestra solidaridat un cu otro. Un pandemia cu, apesar di a laga nos den crisis financiero, el a uni nos como pueblo. E pandemia a muestra nos e forsa di union y danki na e union aki, y danki na e amor y solidaridat un pa otro, nos a logra surpasa e peor crisis mundial den historia di nos pais.

Den nomber di Gobierno di Aruba Prome Minister Evelyn Wever-Croes ta gradici cada ciudadano di nos pais cu di un manera of otro tawata solidario durante e pandemia. Un gratitud enorme na cada empleado publico cu a sa di entrega na e momento cu no tawata facil pa e mayor parti di nos comunidad, especialmente, esnan den sector priva cu a perde trabou of mester a bay cas cu salario reduci, como esnan mas vulnerabel den nos comunidad.

“Pero cu e determinacion y dedicacion cu nos Arubianonan tin, nos a sa di recupera fuerte.

Awe nos turismo ta kibrando tur record, desempleo ta bahando,

nos economia ta recuperando, e no ta unda nos ta desea, pero bayendo hopi bon despues cu Gobierno mester a cera frontera na aña 2020. Den Gobierno nos por mira un sinergia di union, positivismo y dedicacion. Ministernan trahando hunto pa Aruba ‘bounce’ bek mas fuerte y resiliente. Nos meta ta pa diversifica nos economia, crea oportunidad pa trabounan pa tur ciudadano y sigui traha riba un finansa resiliente.

Ta den union so nos lo logra nos meta final, un Aruba stabiel. Gobierno di Aruba lo sigui na mesa cu Hulanda pa fortifica e relacion, nos lo tin nos diferencianan pero semper un trato di respet pa otro. Gobierno tin un compromiso solido cu Aruba, un compromiso pa traha duro y incansablemente pa recuperacion di nos pais”, Prome Minister Evelyn Wever-Croes a enfatisa.



Prome Minister Evelyn Wever-Croes: DELEGACION DI ARUBA TA REUNI CU SEÑOR TIM 'S JONGERS



Den cuadro di e reunionnan strategico cu Pais Aruba ta ehecutando, diamars dia 20 di juni, Minister Plenipotenciario di Aruba, señor Ady Thijsen y ekipo conhuntamente cu TWO-AUA a reuni cu señor Tim 'S Jongers. E reunion tabata tin caracter informativo durante cua a para keto na diferente tema cu ta regarda reforma, maneho y ehecucion di esaki. Aruba ta na porta di ehecucion di diferente reforma pa ta i resiliente y den esaki ta esencial pa siña di locual otro pais a ehecuta exitosamente y tambe no ripiti erornan cometi.

A base di experiencia amplio di señor 'S Jongers riba tereno socioeconomico y cu por cierto ta autor y columnista renobra na Hulanda, a ricibi conseho riba diferente methodo cu ta wordo aplica den practica ora cu ta duna contenido na reforma. Asina a papia ampliamente riba e tema di red di siguridad social y importancia di diseña maneho cu esnan mas vulnerabel den mente. A trece dilanti cu un acercamento multifacetico teniendo cuenta cu pluralidad di casonan ta crucial pa introduci un red di siguridad social robusto exitoso. A indica cu den tur esaki ta esencial pa duna importancia y oportunidad di participacion na esnan cu tin experiencia di bida y no solamente experticio. Asina ta cera e buraco entre esnan di menos y mas recurso (incluso educacion).

A indica cu hopi problema fundamental di siguridad social y den

comunidad no ta para riba nan mes. Esaki hopi biaha tin como consecuencia cu individuonan cu ta depende di Gobierno, contrario na esnan cu tin suficiente recurso, tin dificultad pa yega na instancianan gubernamental. E aspecto aki, e expertonan ta indica, ta crea desconfiansa den Gobierno. Pa e motibo aki ta esencial pa formula maneho accesibel pa esnan mas vulnerabel. A base di experiencia den practica señor 'S Jongers a duna ehempel di programa cu tabata exitoso na Hulanda y tambe a duna conseho di eror cu por preveni ora kier implementa reforma y stimula cambio. E delegacion di Aruba tabata sumamente contento di por a ricibi e informacion valioso aki y participa na e reunion strategico y informativo.

E delegacion di Aruba ta bou di encargo di Minister-President di Aruba señora Evelyn Wever-Croes y lidera door di Minister Plenipotenciario di Aruba, señor Ady Thijsen. Hunto cu representante di Tijdelijke Werkorganisatie Aruba, señora Indra Zaandam, ta participando na diferente reunion strategico den cuadro di Aruba su trayecto di recuperacion.

Prome Minister ta gradici e delegacion di Aruba pa e trabounan cu nan ta bin ta haciendo den cuadro di e recuperacion di Aruba despues di e crisis di e pandemia y ta desea nan exito den e reunionnan strategico cu ta tumando luga y forsa pa continua cu e trabounan pa realisa e metanan cu exito.

Prome Minister Evelyn Wever-Croes:

Diabierna 23 di Juni

SINTONISA 'PERIODISTA PA UN DIA'

Via TeleAruba y riba pagina di Facebook di Gabinete Wever-Croes



E siguiente programa di 'Periodista Pa Un Dia' den e di dos edicion di Conferencia Hubenil ta tuma luga diabierna 23 di Juni. Un total di 6 mucha di diferente scol y edad, cu desde hopi tempran a registra pa participa, lo haya e oportunidad pa conoce Prome Minister Evelyn Wever-Croes y haci preguntanan na Prome Minister. E conferencia aki ta tuma luga den e sala di conferencia di Gobierno di Aruba y por wordo sintonisa via TeleAruba y riba pagina di Facebook di Gabinete Wever-Croes.

Prome Minister a expresa, cu e bunita di e proyecto aki ta, e interes di e muchanan pa ta parti di e proyecto. E creatividad pa cu e preguntanan cu nan ta haci Prome Minister ta resalta, y cu hopi entusiasmo, Prome Minister ta contesta cada un di nan. E meta final di e proyecto, ta pa nos muchanan, for di un edad hopi jong cera conoci cu e trabou di periodismo.

Pa duna e proyecto di "Periodista Pa Un Dia" mas contenido, ta invita cada siman un periodista di TeleAruba, pa conta e muchanan un tiki di e trabou di periodismo y di nan experiencia como periodista. Tambe, nan ta prepara e muchanan pa e Conferencia di Prensa Hubenil Live. E prome periodista invita tawata Andrew Vrolijk, e di dos tawata Patrick Everon y e siman aki lo ta presente, señora Alejandra Forero cu lo guia e muchanan, prome cu nan bay sala di Consejo di Minister pa cera conoci cu Prome Minister.

Prome Minister ta gradici tur mayor pa permiti nan yiunan registra pa e programa aki, y tur e scolnan pa stimula nos muchanan pa participa. Un danki special ta bay na e muchanan cu tin interes pa participa den e programa y pa ta "Periodista pa un Dia. "E muchanan ta sorprende mi den e forma cu nan ta prepara y e interes cu nan tin. Pa mi ta un gran honor y placer di por contribui na e desaroyo di nos muchanan den nos comunidad" Prome Minister a expresa.





Celebracion Dia di San Juan – Dera Gay 2023:

MINISTER DI CULTURA XIOMARA MADURO A BISHITA ARCO IRIS KLEUTERSCHOOL



E siman aki Minister di Cultura ta bishitando varios scol den cuadro di Celebracion Dia di San Juan – Dera Gay cu ta dia 24 di juni proximo. Scol Preparatorio Arco Iris tambe a ricibi bishita di e mandatario. Minister Maduro a splica e muchanan riba e tradicion di e fiesta di Dia di San Juan – Dera Gay, con esaki ta wordo celebra antes y awo, e bailenan tradicional, contamento storia y diferente wega cu ta parti di e celebracion di Dia di San Juan. Ta conoci cu parti di e Fiesta di San Juan den pasado tabata e cendemento di candela y awendia no ta permiti mas pa cende candela, pasobra esaki ta dañino pa nos salud y pa nos medio ambiente. E muchanan a canta y a duna un demostracion con ta baila y fiesta San Juan. Ademas e muchanan a participa den e concurso di grito di gay.

Minister Maduro a invita tur mucha y mayor pa bishita e diferente celebracion cu ta bay tin den diferente distrito. Como tambe e mandatario a motiva nos muchanan pa participa den e concurso di pintamento cu tin den e buki "E cosecha di Juancho". E muchanan tambe a wordo invita pa sintonisa e 8 episodio di Historia di San Juan – Dera Gay cu UNOCA a produci. Esaki ta wordo pasa henter e siman aki na canal di television local, na Telearuba pa 5 or di atardi, Diario TV Canal 48 pa 6 or di atardi y Canal 22 pa 7 or y mey di anochi. Minister Maduro a pasa un rato placentero na Arco Iris Kleuterschool y a gradici nan pa e bunita recepcion.



POTRETNAN DI ARCO IRIS
KLEUTERSCHOOL





HUNTO CU CABESANTE- Y DOCENTENAN DI GYM A EVALUA WEGANAN ESCOLAR 2023

Na luna di augustus proximo ta publica e schedule y programa nobo pa aña escolar 2023 – 2024



Diabierna ultimo, Minister Endy Croes hunto cu IBISA y comision organizado di Ministerio di Enseñansa y Deporte a reuni cu e cabesante- y docentenan di gym di e scolnan cu a participa den Weganan Escolar 2023. Hunto a evalua Weganan Escolar 2023 riba diferente aspecto e.o. apertura, pakete di cuminda, disciplinanan y orario di e weganan durante henter e siman. Tambe, a evalua clausura y e competencia di Baile Cultural y Deportivo. A intercambia idea- y deseonan cu di cual e comision a tuma nota di nan.

Minister Endy Croes ta kere den traha di cerca cu tur stakeholders y pa hunto pa evalua e bunita ideanan cu a wordo treci dilanti y cu lo bay traha riba esakinan. Na final di luna di augustus proximo e schedule y programa nobo pa aña escolar 2023- 2024 ta wordo publica cu e fechanan di clasificacion di Weganan Escolar 2024 pa asina e scolnan tin e tempo pa por planifica. Esaki cu e meta final pa engrandece Weganan Escolar. Concluyendo, Minister Endy Croes a enfatisa cu hopi ideanan bunita a keda treci y pronto lo presenta e plan nobo pa aña escolar 2023 – 2024.



A CONDUCI UN INVESTIGACION RIBA E CANTIDAD DI EDIFICIO Y LOKAAL DI SCOL CU TIN DISPONIBEL NA ARUBA

Minister di Enseñansa y Deporte Endy Croes a reuni cu Sr. Eric Mijts di Universidad di Aruba. Recientemente, a haci un peticion pa Universidad di Aruba conduci un investigacion amplio riba e cantidad di edificio y lokaal di scol di Dienst Publieke Scholen (DPS) cu tin disponibel. Tambe, ta haciendo un investigacion riba e cantidad di mucha cu ta naciendo e ultimo 4 pa 5 añanan. E meta di e investigacion aki ta pa evalua cuanto lokaal ta bay tin mester den e añanan nos dilanti.

Manera ta conoci, a base di e rapport di Central Bureau of Statistics (CBS), ta indica cu menos mucha ta naciendo den e ultimo añanan na Aruba. Pues, Consejo di Minister a haci un peticion pa conduci e investigacion aki pa por trece claridad di e cantidad di edificio y lokaal cu ta bay tin mester den futuro. Despues di ricibi resultado di e investigacion aki, lo haci peticion na tur



otro schoolbestuur cu no ta resorta bou di Gobierno di Aruba pa tambe participa den investigacion aki, pa asina tin un bista mas cla di esaki.

MINISTER ENDY CROES TA DIALOGA CU SR. BERRY VAN DRIEL DI BASEBALL KINGDOM OF THE NETHERLANDS

A traves di e programa di Zoom Meeting, Minister di Enseñansa y Deporte Endy Croes a reuni cu Sr. Berry van Driel di e ekipo di baseball, Kingdom of the Netherlands. Durante e reunion a dialoga tocante e proyecto, Kingdom Legacy Breathing Talent, unda cu Major League Star di Aruba y Curaçao ta forma parti di e team cu a participa na World Baseball Classic na maart ultimo. Actualmente, ta preparando pa e World Baseball Classic aki 4 aña, cual nan deseo ta pa realisa esaki na Aruba den luna di october.

E ekipo aki ta consisti di un delegacion di 35 persona. Naturalmente, Aruba ta bay duna su aporte y haci cierto inversion pa asina hunga tres (3) partido na Aruba. Durante e siman di World Baseball Classic lo percura pa e profesionalnan retira, entre otro, Hensley Meulens y Robert Eenhoorn y e profesionalnan di baseball cu ta disponibel, duna diferente tayer gratuito pa nos mucha- y hobennan local cu ta practica e deporte di baseball. Minister Endy Croes ta expresa cu e ta un bunita proyecto cu kier trece Aruba, den cual fin di juni lo tuma un decision final.



MINISTER ENDY CROES TA FELICITA E ALUMNONAN CU A HAAL NAN CERTIFICADO Y DIPLOMA A Y B DI LANDAMENTO ESCOLAR



Diahuebs mainta, a tuma luga examen di landamento pa ocho (8) alumno di Scol Basico Dornasol y un (1) alumno di Scol Caiquetio na Piscina Olimpico Roly Bisslick Savaneta. Minister Endy Croes tabata presente pa entrega e certificadonan Cangreu Contento, Strea di Lama y diploma A y B na e alumnonan cu a pasa nan examen di landamento exitosamente. Manera ta conoci, despues di hopi lucha a logra pa e alumnonan di Scol Basico Dornasol pa participa den e proyecto Landamento Escolar. Landamento ta importante paso bo ta siña e muchanan pa salba nan mes den awa.

Minister Endy Croes ta felicita e alumnonan cu a haal nan certificado y diploma di landamento.

E dignatario a enfatisa cu despues di a lucha hopi den pasado, awendia e instructornan di landamento tin un contract di 5 aña. Alabes, Mandatario di Deporte ta gradici e instructornan di landamento pa nan dedicacion, profesionalismo y contribucion na e grupo grandi di alumnonan y awe ta mira e balor di esaki unda cu e prome 9 alumnonan a ricibi nan diploma. Minister Endy Croes a indica cu otro siman tin examen di landamento



pa e alumnonan di klas 3 di scol basico. Mandatario di Deporte ta desea e alumnonan hopi exito y cu disciplina, deseo, dedicacion y determinacion boso ta logra.



POTRETNAN DI DIPLOMA A Y B DI LANDAMENTO ESCOLAR



Minister Endy Croes:

LO HACI UZO DI EDIFICIO DI JOHN WESLEY COLLEGE PA REALOCA OTRO SCOL RESORTA BOU DI SPCOA

SPCOA como directiva di e scol a tuma decision pa cera John Wesley College y no Gobierno di Aruba



Manera nos sa, scol secundario John Wesley College ta resorta bou di e Stichting Protestants Christelijk Onderwijs Aruba (SPCOA) y pa e motibo aki SPCOA ta e unico cu por tuma decision riba e scol aki. Recientemente, SPCOA a splica ampliamente den prensa cu nan a reuni cu diferente miembro di parlamento, entre otro, Mike Eman y algun miembro di fraccion di AVP. SPCOA a pone esaki den un carta pa splica e motibo cu nan a yega na e decision di cera John Wesley College. A pesar cu Gobierno di Aruba

semper a duna y te e dia di awe ainda ta dunando John Wesley College subsidio, nan a splica cu den e ultimo cuater (4) añanan e cantidad di alumno a disminui di 227 pa 64 alumno. Financieramente e no ta factibel pa SPCOA mantene e scol habri cu cantidad limita di alumno of lo mester a yega na decision pa aumenta schoolgeld drasticamente. Manera a splica anteriormente, Gobierno di Aruba no por tuma decision riba un stichting.

Ta masha lamentabel mes cu Mike Eman ta gara e bandera politico despues di e caso di Avestruz, unda el a wordo acusa den caso di corrupcion pa defende su amigo y colega Benny Sevinger cu tin un condena di hues riba su nomber. Por a mira con Mike Eman a bay cende bela y hunga cu emocion di esnan den veld di enseñansa na San Nicolas, purbando di benta e culpa riba Minister di Enseñansa Endy Croes y Gobierno di Aruba. Mike Eman a uza algun aliado riba lista

politico, entre otro, juffrouw di scol Otami Thomasia y cabesante di Colegio Hilario Angela, Sra. Cornelia Aventurin Connor pa defende corrupcion y manipula informacion cu no ta berdad. Ta masha lamentabel cu juffrouw Aventurin ta participa den un acto baho asina y ta pone hende cuestiona su capacidad como cabesante di un scol. Ademá, tin un rapport riba e scol aki y lo trece esaki mas adelante. Minister di Enseñansa ta expresa cu e ta lamenta cu partido di AVP ta uza esaki pa campaña politico. Finalmente, e mandatario di Enseñansa ta señala cu e edificio di John Wesley ta keda habri y lo realoca otro scol resorta bou di SPCOA na e edificio aki. Ningun mucha a keda sin scol y ningun docente a keda sin trabou, mirando cu SPCOA a percura pa aloca tur na otro scol. Pues, ban laga e caso aki den pasado, ban enfoca den futuro di Pais Aruba y garantisá un enseñansa di calidad pa nos mucha- y hobennan.

Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO!